

Eleccion

RUDY Y TICO CROES GRAN PERDEDOR Y GRAN GANADOR

O'STAD-Un di e derotanan di mas grandi sufri pa e partido MEP sin duda, tabata di partido di nan candidato number dos riba lista, esta Rudy Croes. Apesar di a hiba un campaña formal den casi tur distrito, e popularidad di Rudy a bin sufri un caída formal di casi 50% compará cu e eleccion di 1989. Loke ta resultá mas resaltante den e "perdida" aki, ta cu e votonan di Rudy di ningun manera a bai pa su sobrino Glenbert Croes, lider di e partido OLA. E yiu di e difunto lider di MEP, esta Betico Croes, a ricibí un total di 1788 voto, pero a conta cu apoyadonan grandi den otro barionan.

Un di e partinan cu mas a bin perhudicá e number dos riba lista di MEP sin duda,

tabata e propaganda cu el a lanza net algun dia promer cu eleccion, den cual e ta muestra un Betico yorando y caminda e ta hura cu e lo no traicioná su ruman nunca. Rudy a duna e impresion cu Glenbert sí a traicioná su tata y a te hasta hura na Dios dilanti di e camaranan di television. Hopi ta esnan cu a condená e propaganda aki y sigur no a haña e acogida cu Rudy a spera serca su seguidoman.

TICO TREMENDO

Tico Croes di AVP sin duda a bin resulta un di e candidatonan mas ganador di e eleccion aki. E hoben político aki ta muestra di tin un futuro grandi su dilanti, sigur awor cu e pueblo votador a duné un sosten asina grandi. Tico a bin con-

océ un aumento di mas cu 50%, pues net lo contrario di Rudy Croes di MEP. Durante di e eleccion na 1989 Tico a logra un total di 500 voto mientras cu diabierna último un total di 1133 persona a duné nan sosten, loke sigur tabata un señal di apoyo pa su forma di pensa y su forma di hiba política.

E aumento aki sin duda tabata un satisfaccion sin duda, sigur mirando e abuso cu e candidato aki y su famianan mester a pasa aden durante di e campaña aki. E apoyo aki na Tico ta otro muestra cu nos país ta pidi pa cambio den e mentalidad político anticuá cu ta bibando serca hopi di nos políticonan.